




滇  
繫

ル 5  
3254  
36



凡 5  
 3254  
 36

滇繫書目



趙州師 範荔屏纂輯

土司	冊下	一
雲南府	二	二
曲靖府	一	一
臨安府	三	三
潞江府	一	一
廣南府	二	二
元江州	二	二

滇

九之二

土司目錄



開化府	一
昭通府	一
大理府	十
楚雄府	八
姚州	一
鶴慶州	四
順甯府	二
永北廳	四
麗江府	一

蒙化廳	二
景東廳	四
永昌府	七
騰越土司	南甸 隴川 干崖 盞達 猛卯 腳撒
騰越舊轄四土司	明光隘 大塘隘 古勇隘 遮放
騰越邊外三土司	孟養 孟密 木邦

真卷九之三  
土司目錄  
二

滇繫

土司繫

趙州師 範荔扉纂輯

雲南府

羅次縣煉象關土巡檢元時李焯為防送千戶明洪武中從  
 征歿於陣錄其子阿白為巡檢傳十一世至李文秀 本朝  
 平滇文秀投誠仍授世職文秀死子廉傑襲廉傑死叔昆秀  
 襲昆秀死子廷傑襲廷傑死子清臣襲  
 祿豐縣南平關土巡檢元時李喜奴為土官明洪武中子李  
 矣以宣諭各蠻陞巡檢六傳至李印以征阿克死於陣無子

海豐  
以李矣次子李羅綺之第六世孫李惟賢襲惟賢死子楚南襲 本朝平滇楚南投誠仍授世職楚南死無子公舉以嫡支李印之同祖弟惟白襲惟白死子文南襲文南死子天渥襲天渥死叔秀南襲秀南死孫毓俊襲

曲靖府

平彝縣土縣丞元末龍海為土官明洪武中歸順改其地為越州以海知州事及海子阿資叛伏誅其地分屬霑益陸涼永樂初資子祿甯詣闕奉貢詔授甯土縣丞與亦佐沙氏分土而居傳至海潮以功加土州判沿至自明子闊 本朝平

滇闊投誠仍予世職康熙八年裁縣安插闊於越州闊死子細乾襲細乾死弟納乾襲二十四年改平彝土縣丞納乾死一清襲一清死從弟藏珍襲

臨安府

納樓茶甸土副長官司明初普少歸附授副長官歷傳十一世至普率 本朝平滇普率投誠仍授世職康熙四年率附王祿叛官兵討之乞降赦之以子向化襲向化死子仁襲仁死子天民襲

虧容甸土副長官司元時阿附為虧容甸部長明洪武中歸

附賜姓孫授正長官司傳九世至孫大昌 本朝平滇大昌  
投誠授副長官司世職大昌死子永祚襲永祚死子世基襲  
納更山土巡檢明洪武中龍嘴以開荒有功給冠帶管理地  
方尋授土巡檢傳子龍政沿至龍統龍昇龍天正 本朝平  
滇天正投誠仍授世職天正死子在田襲在田死子躍襲

澂江府

新興州土州判 本朝康熙十九年復滇新興州土人王鳳  
授偽遊擊職迎至廣西路投誠隨剿石門坎馬別河黃草壩  
皆有功授土州判世職鳳死子迪吉襲迪吉死子遴襲

廣南府

土同知元時儂郎舉爲宣撫有二子長不花次正祐明初不  
花子郎金歸順授土同知死無嗣正祐襲後以罪死至洪熙  
時儂郎舉緣事降爲通判郎舉死子印舉襲正統中以征麓  
川功復同知傳至文舉歷有戰功文舉死應祖襲從官兵征  
三鄉親獲賊首阿機等賜白金百鎰後又以征吐蕃尋甸功  
賜四品服應祖死子紹周襲隨征東川尋甸有功授土知府  
紹周死子鵬襲 本朝平滇鵬投誠授同知世職鵬死子繩  
英襲繩英死子振紀幼妻嚴氏撫孤攝事振紀旋死庶子振

裔辦理地方事務

土富州知州元時沈郎先為富州安甯二州土官子永秀梁  
王署為元帥明洪武中永秀歸附尋死子大忠嗣守邊有功  
授知州傳十四世至崑瑋 本朝平滇崑瑋投誠仍授世職  
後以罪黜弟崑城攝襲尋死姪肇乾襲雍正八年以犯法革  
職委其子燦學習辦事

元江州

新平縣土縣丞楊宗周舊係魯魁山賊目 本朝康熙二十  
七年臨安知府黃明同總兵馬山招撫向化授宗周土縣丞

世職宗周死子世恩襲世恩死子昌祚襲

了味二巡檢普為善舊係魯魁山賊目於 本朝康熙二十

七年同楊宗周受知府黃明招撫授土巡檢世職為善死子

永昌襲永昌死子成忠襲

開化府

土經歷周應龍本開化府猓獯 本朝康熙十九年大師復

滇以偽守備投誠從征石門坎黃草壩有功給以總兵劄付

於康熙二十二年改授土經歷准其世襲應龍死子榮昌襲

榮昌死子天爵襲

昭通府

永善縣阿興土千戶阿興土夷安永長於 本朝康熙三十  
 四年以化諭苗蠻有功授阿興土千戶給印信駐防檜溪雍  
 正六年米貼祿氏吞都德昌叛永長奉文堵截擒獲德昌等  
 八年德昌土舍木谷四哥等從烏蒙叛挾怨共殺永長子天  
 桂襲

鎮雄州土知州原為芒部路隴氏世為酋長明初設芒部府  
 隸雲南洪武十六年改為芒部軍民府隸四川仍以隴氏為  
 知府嘉靖三年隴政隴壽兄弟爭立改設流官改芒部為鎮

雄軍民府七年夷酋普奴等叛平之仍令壽子勝襲知府職  
 勝傳子清清傳子來鳳來鳳死妻祿氏更名隴應祥辦理府  
 事水西酋叛應祥有保固功授貴西道卒封正議大夫子懷  
 玉襲授太僕卿懷玉卒子鴻勳襲 本朝平蜀鴻勳投誠仍  
 授世襲傳至天成聯嶽聯嵩聯嵩死子慶侯襲雍正五年烏  
 蒙叛以藏匿奸匪革職配江西改土府為州設流官隸雲南  
 大理府

趙州定西嶺土巡檢元末李清宇為彌只防守千戶明洪武  
 十七年歸順授土巡檢傳至李齊月無子弟齊斗襲 本朝



平滇齊斗投誠仍授世職齊斗死子警孫天成襲天成死子  
紹廷襲

雲南縣土縣丞明洪武十六年征雲南有楊奴者率眾歸附  
授土縣丞正統三年楊宗以從征麓川功累陞知縣嘉靖十  
三年楊訓以奉拘景東土知府陶炳被許仍降縣丞及鳳氏  
叛訓戰歿詔立祠表其忠萬厯中楊如檀隨征麓川以忠勤  
著及死子淇襲淇死子玉蘊襲 本朝平滇玉蘊子岳投誠  
仍授世職傳子肇基襲肇基死子國泰襲國泰死弟國臣襲  
土主簿元末有張興者張樂進求之後世爲品甸千戶明洪

武中大兵下楚雄興首倡効順爲鄉導招甸民降獻甲馬後  
又攻石寨有功授土主簿與楊氏分土而居沿至張綱死子  
福曜福星遞襲皆無嗣弟張維襲 本朝平滇維投誠未幾  
死以子祖蔭授世職祖蔭死子祚宏襲

鄧川州青索鼻土巡檢元末楊良爲平化州判官明克大理  
以招叛功授土巡檢世襲沿至應龍無子弟應鵬襲 本朝  
平滇應鵬投誠仍授世職應鵬死子鎮海襲鎮海死子國楷  
襲

浪穹縣土典史明洪武中開滇土官王藥師以芻粟餉大軍

授鄧川州吏目後以征普顏篤功改浪穹典史每有征調皆以兵從沿至夢祖死子鳳洲襲 本朝平滇鳳洲投誠仍授世職鳳洲死姪晉襲晉死孫之成襲

蒲陀崆土巡檢明洪武十五年指揮周能典大理衛事以土官楊順充通事招撫蒙化白崖等處授土巡檢屢建功沿至鳳階死子瞽孫爭先襲 本朝平滇爭先投誠仍授世職爭先死子續鵬襲續鵬死子遺龍襲

鳳羽鄉土巡檢元末尹勝爲木邦府判明初克大理歸順破佛光寨有功授土巡檢安鳳之亂嘗從阿氏攻李鎖飛李牙

保等寨沿至世忠無子弟秉忠襲秉忠死子德化襲德化死弟德明襲 本朝平滇德明投誠仍授世職德明死子承祚襲

上江嘴土巡檢明洪武開滇楊信以芻糗餽大軍從破佛光寨授土巡檢沿至廷舉傳應接傳斌斌傳康國 本朝平滇康國投誠仍授世職康國死弟福國襲福國死子暉襲下江嘴土巡檢明洪武開滇何海率土民歸順以破佛光寨功授土巡檢沿至養正死子光祖襲光祖死子應福襲 本朝平滇應福投誠仍授世職應福死弟一清襲一清死子紹

勳襲

雲龍州箭捍場土巡檢元時有字忠者武定土府之次子也  
明洪武開滇率眾歸命授土巡檢後廷宣屢從討安銓鳳朝  
文諸賊沿至元勳從征奢酋有功陞州同子顯道以明經不  
願襲職孫題鳳襲 本朝平滇題鳳拔誠授世職以土州同  
管巡檢題鳳死子世吳襲世吳死子昉義未襲死孫生文襲  
生文死弟生民襲

十二關土副長官元末李羅賽為防送干尸明初以招附品  
甸功授副長官傳至祚昌以恢復炎霑功加銜遊擊傳子清

以冠帶任事清死子恬森襲 本朝平滇恬森拔誠仍授世  
職恬森死子高傳襲

楚雄府

楚雄縣土縣丞元末楊永廉為縣丞傳楊益明初歸附授世  
職從征麓川及緬有功沿至紹先傳宏道宏道傳宗儒宗儒  
傳春盛 本朝平滇春盛投誠仍授世職傳子毓秀毓秀死  
子世勳襲

鎮南州土州同元末段良為金齒路僉事明洪武十五年劾  
順授土州同沿至段欽傳承祖承祖傳明柱明柱傳光先光

先死無子弟光贊襲 本朝平滇光贊投誠仍授世職光贊  
死子恆敬襲

土州判元末陳均祥爲威楚路土官明初効順宣力授土州  
判後再入覲賜誥命沿至國試傳景勳景勳傳膳科膳科傳  
昌虞 本朝平滇昌虞投誠仍授世職昌虞死子振世襲振  
世死無子查取世系以國試次子大勳之孫典愚襲典愚死  
子繼虞癡聾不能任事以孫輔世襲

阿雄關土巡檢明洪武開滇者伯隨征有功授土巡檢沿至  
利仁傳壁峯壁峯傳祚祚傳文文傳光祖 本朝平滇光祖

投誠仍授世職光祖死子宗盛襲

鎮南關土巡檢明洪武初楊堂歸附征南有功授土巡檢沿  
至世惠傳珏珏傳繼祖 本朝平滇繼祖投誠仍授世職繼  
祖死子可喬襲可喬死子仕傑襲

定遠縣土主簿元末定遠人李祿久以軍功委掌本縣印務  
明初歸順有功仍授知縣傳子苴改授土主簿沿至李文傳  
國用國用傳玉玉傳世卿 本朝平滇世卿投誠仍授世職  
世卿死子濬襲濬死弟濟襲濟死子德晟襲

廣通縣回澄關土巡檢明洪武十七年楊保歸順隨征有功

授土巡檢沿至楊光寵傳懋懋傳忠祚忠祚傳弟忠蓋  
本朝平滇忠蓋投誠仍授世職忠蓋死子琮襲琮死姪士龍  
襲士龍死姪恆襲

沙矣舊土巡檢明洪武十五年蘇成充黑井竈長解鹽入省  
授把總二十八年武定賊者反劫課成率鄉兵斬之授土巡  
檢沿至蘇什得傳起鸞起鸞傳鑑 本朝平滇鑑投誠仍授  
世職子承宗襲承宗死弟承祖襲承祖死子顯仁襲

姚州

姚州土州同元末高義爲知州明初其子惠歸順授州同沿

至應騏傳曷曷傳晶晶傳顯錫 本朝平滇顯錫投誠仍授  
世職顯錫無子姪輔襲輔死子啟宗襲啟宗死弟宗亮襲

鶴慶州

土通判元時高惠直爲總管子賜爲土千戶傳至高海歸明  
以征佛光寨有功授千夫長沿至高玉贈明威將軍子藩臣  
以功授指揮僉事傳至應星 本朝平滇應星投誠仍授世  
職應星死子彥襲康熙二十二年改土通判彥死孫法襲  
在城驛土驛丞元末田宗爲府判明洪武十五年歸順以從  
征普顏篤佛光寨有功授土驛丞沿至得惠傳泰年泰年傳

滇  
珍 本朝平滇珍投誠仍授世職珍死子世祿襲世祿死孫  
生蕙襲

觀音山土驛丞明洪武十六年郭生歸附從征佛光寨有功  
授驛丞沿至郭維藩傳陞陞傳朝鎮朝鎮傳朝桂 本朝平  
滇朝桂投誠授世職朝桂死朝鎮子鼎襲鼎死子紹儀襲紹  
儀死子斌襲

雲州大猛麻土巡檢明初王有德歸順以名同穎國公去德字擒  
獲天松坪賊楊奴等授土巡檢沿至王之和傳欽欽傳印兆  
本朝平滇印兆投誠仍授世職印兆死子天受襲

順甯府

雲州大猛麻土巡檢明洪武初有土舍奉健者大侯州土知  
州之分派也四傳至恭於萬曆二十五年以征大侯奉學有  
功尋改大侯爲雲州授恭土巡檢恭傳詔詔傳朝宣朝宣傳  
新命 本朝平滇新命投誠仍授世職新命死子召寶襲  
猛緬長官司其先奉布明洪武初開闢猛緬土地招集民夷  
世爲土舍四傳至奉應於萬曆中以從討猛麻奉供仇殺有  
功授長官司奉應死子陞肆虐爲頭目奉墮所殺弟奉鼎奉  
星爭立鼎奔孟連星恃耿馬而木邦猛卯從中助兵巡撫周

嘉謨檄金騰道爲之解紛令鼎星分食其地以其母陶氏護  
印鼎傳姪寶以沙定洲之叛赴援加宣撫司子國珍襲本  
朝平滇國珍投誠仍授宣撫司職國珍死子聖襲改爲長官  
司聖死子廷徵襲

永北廳

永甯府土知府明洪武十四年土官卜都各吉以所轄部民  
來歸授永甯州土知州卜都死子各吉八合嗣永樂三年令  
香羅革甸瓦魯之刺次和四部番夷火頭板必他布郎吉分  
阿只苴等入朝嘉之陞永甯爲府授各吉八合中順大夫賜

鍍金花帶鐫四字曰克篤忠誠更以香羅革甸瓦魯之刺次  
和爲長官司授板必他等副長官後八合老病子卜撒襲爲  
四川鹽井土官喇馬非所侵父子俱被殺卜撒妻訴於鎮守  
逮喇馬赴京道死因疆理其地以卜撒弟南八嗣其職正統  
中鹽井諸蠻侵據之土官不能治乃請設流官同知經歷各  
一治署於浪滄衛握郡符遙治之沿至銓死子鎮麒襲本  
朝平滇鎮麒投誠仍授世職傳子阿庭銀庭銀死子錦輝襲  
錦輝死子錫遠襲錫遠死弟錦先襲錦先死子有威襲康熙  
三十八年改屬永北府

北勝州土知州元末高斌祥爲北勝土知府累官雲南行省左丞明洪武中改府爲州二十二年斌祥子高澤以軍功授知州澤孫昶以征麓川功加府同知仍管州事昶曾孫崙以征安鳳功進階朝列大夫崙曾孫世懋以征順大功授四品服世懋死弟世昌襲世昌死子斗光襲 本朝平滇斗光投誠仍授同知世職子贊熙襲三十八年改州爲府設流官贊熙死子勳改授北勝州土知州勳死孫耀龍襲

土州同元末章吉帖木兒爲北勝土知府明克大理以部民及順州民降納所握印及麗江宣撫司印三珠虎符西平侯沐英令其子觀音奴從軍因兵逃伍乃降爲州同與高氏翼居州治左右沿至成文傳永永傳柱國柱國傳興國 本朝平滇興國投誠仍授世職興國死無子庶兄佐國襲佐國死子法祖襲

順州土州同元時子曰爲土知州至子輿歸明授州同沿至如璧傳一龍一龍傳天錫以軍功加銜遊擊進階知州傳子祿祥 本朝平滇祿祥投誠仍授州同世職祿祥死子大賢襲大賢死子玠襲玠死子肱襲

麗江府



土通判其先麥宗西域人宋理宗末始入麗江通各方語土人推爲酋長子阿良元時爲麗江路軍民總管傳至木得明洪武初入貢歸附後以克石門寨功授土知府賜姓木又從吉安侯征巨津捕阿奴聽於吐蕃斬僞元帥朱保及沐西平征景東定邊咸在行閒得死子初襲值白交山及僞平章買哈喇麓川思任之亂咸有戰功賜金牌誥命改麗江軍民府令世居西郵捍吐蕃每有征調但輸兵餉而兵不出以重邊守沿十三世至木增代有封贈錫予增在任值北勝蠻亂以兵擒首逆高蘭又值遼左軍興輸餉二萬於戶部天啟二年

陳言十事下部議可嘉其忠誠加參政晉太僕卿賜璽書榮其先世增死子懿襲 本朝平滇懿投誠仍給土府印懿死子靖襲靖死無嗣弟櫛襲櫛死子垚襲垚傳子興興死無子弟鍾襲以土人控告於雍正元年改爲通判鍾死子德襲

### 蒙化廳

土知府元時左青羅爲順甯府同知傳至禾爲九部火頭順甯司通事明洪武中歸附仍其職後官兵征高大惠等遣禾招諭降之因授蒙化州判永樂中陞知州子左伽正統中納米陞同知後從征麓川累功陞大理府土知府仍掌州事尋

陞州爲府遂實授知府沿至近嵩傳子星海 本朝平滇星  
海子世瑞投誠仍授世職世瑞死子嘉謨襲嘉謨死子麟哥  
襲  
舊定邊縣土縣丞明洪武初蠻長刀思良叛阿魯捐助糧餉  
奮勇效謀擒獲思良授土縣丞沿至阿天明傳廷相廷相傳  
應鯤應鯤傳志經 本朝平滇志經投誠仍授世職志經死  
子世忠襲世忠死弟世勳襲世勳死子抱琛襲

景東廳

土知府元時阿只魯爲遠幹府開南州管理統威遠州及案

板母龍猛統三甸明初兵至楚雄只魯子俄陶遣通事姜固  
宗阿哀等納款獻印弁鎧仗馬匹乃改遠幹開南爲景東府  
命陶知府事賜姓陶後因緬目思可伐來侵戰敗奔白崖調  
神策衛鎮其地是爲景東衛尋從大兵剿寇有功頒賜金帶  
鐫誠心報國四字及銀幣甚厚陶死子幹襲幹傳瓚偕衛兵  
攻麓川者張羽牙殺奉撒等晉階大中大夫沿及陶金攻鐵  
索米魯那鑑安銓鳳繼祖烏撒諸役皆以兵從金傳子淞淞  
傳子明卿明卿傳子璽璽傳子爾鑑爾鑑死無子以淞孫奎  
襲 本朝平滇奎投誠仍授世職奎死孫澧襲澧死無子奎

次子大鑑襲

土知事明洪武中把事姜固宗齋本府金牌印信降尋以象馬入貢又從攻磔嘉功得冠帶子嵩於宣德中陞猛緬正長官後改本府知事沿至可久傳述望述望傳啟賓 本朝平滇啟賓投誠仍授世職啟賓死無子傳叔顯望死子啟武襲三岔河土巡檢明時楊勝為把事宜德中以饋餉攻麓川者張羽牙功得冠帶宏治中於三岔河哨設巡檢司以當賊寇之衝授勝子祥土巡檢後以一碗水九窰坡二哨多寇并令鈐之沿至國翰傳子宏緒宏緒傳弟宏仁 本朝平滇宏仁

投誠仍授世職宏仁死子承文襲承文死子可昌襲保甸土巡檢明宣德中陶暹為頭目貢象入京授土巡檢後從征馬龍他郎甸者張羽牙等寨皆有功陞縣丞管巡檢事傳子華華死曾孫焯襲沿至承宣 本朝平滇承宣投誠仍授世職宣死子增襲增死子舜舉襲舜舉死子瑜襲板橋土驛丞明初阿賽為俄羅舖村長以諳夷語迎送得賓旅心授土驛丞後有功加巡檢銜傳子阿哀哀傳子徐徐傳弟漢賜姓雲漢死弟滄孫必高襲必高死子騰襲騰死子聯極襲 本朝平滇聯極投誠仍授世職聯極死子振宗襲振

宗死子雲仍襲

永昌府

孟定土知府舊名景麻元至順四年立孟定路軍民總管府領二甸隸大理金齒等處宣慰司明洪武十五年改置孟定府正統閒麓川叛知府刀祿孟遠遜失其地有罕賈者從王驢南征擒賊首色鷄色罕授世襲孟定府都督五傳至罕榮萬厯閒參將鄧子龍南征至其地曰豈有土府而加以都督之銜奏改頒知府印榮傳信信傳貴貴傳見明見明傳宋宋傳珍 本朝平滇珍投誠仍授世職珍死令姪刀猛襲傳大

興大亮梁發現襲

灣甸州土知州蠻名細賧自古不通中國元中統時內附屬鎮康路元末景法爲萬戶歸明授濟甸正長官景法子景宋入貢洪武十七年置灣甸州授宋知州萬厯十一年景宗貞率弟宗材導罕虔入寇姚關宗貞死於陣擒宗材斬之以宗貞子景從幼降爲州判後從討猛廷瑞有功復陞知州傳子承恩承恩傳國泰國泰死子先哲幼叔文智護印 本朝平滇文智投誠授世職文智死姪先哲襲先哲死子榮名襲傳毓瑛毓璵廷玉現襲

鎮康州土知州舊名石賧元立鎮康路軍民總管府明洪武十五年改鎮康府十七年改爲州正統中土官刀悶光以隨王驥征麓川功授土知州隆慶閒悶敬娶罕虔女因附虔歸緬萬曆十一年官兵敗緬敬死其叔悶恩歸義授以州事恩死子枳襲木邦思禮誘之歸緬不從令海慶取控尾據之天啟二年木邦兵據喳哩江枳奔姚關守備遣官兵拒之木邦乃退枳死子達襲 本朝平滇悶達投誠仍授世職悶達死子珍襲珍死子鼎襲今傳子問鑑額徵差發銀一百兩直隸耿馬宣撫司原係木邦村寨萬曆閒緬甸侵木邦土官

罕盡忠奔永昌有罕悶坎悶金從鄧子龍征緬恢復木邦給悶坎宣撫司印每歲差發銀五十四兩赴金騰道輸納悶坎死無子弟悶金襲悶金死子悶拏襲 本朝平滇悶拏投誠仍授世職因金騰道裁差發銀赴布政司輸納不隸於府悶拏死子抒忠襲抒忠死子世藩襲世藩死今子國楷襲與孟定府隔喳哩江而居其地有三尖山昔罕虔之黨罕老聚衆負固於此又有養馬山風俗與孟良同

潞江安撫司蠻名怒江甸元隸柔遠路明洪武十五年曩壁法內附授長官司職永樂九年陞安撫司賜姓線氏傳九世

至線有功 本朝平滇有功投誠仍授世職有功死姪崇毅襲崇毅死子國勳襲國勳死子于陞襲于陞死子朗襲額徵差發銀八十兩

芒市安撫司蠻名怒謀又曰大枯賧小枯賧卽唐書所謂芒施蠻也元中統初內附至元十三年立芒施路軍民總管府領二甸明洪武十五年置芒施府正統九年放定正隨征緬有功授芒市長官司萬厯初放福與岳鳳聯姻十一年導緬寇松坡事覺擒福正法立其舍目放緯領司事轄於隴把緯傳珀珀傳廷臣以入貢加授安撫司職傳子國璋國璋傳愛

衆 本朝平滇愛衆投誠仍授安撫世職愛衆死子彌高襲彌高死子天球襲天球死子仁襲仁傳作藩傳愈彰傳愈著現襲額徵差發銀七十兩

孟連長官司由姚關東南行十九程至其地又七程至孟艮其東爲車里西爲木邦蠻名哈瓦慄悍好劫自古不通中國明正統中平麓川始來歸萬厯間其長刀派真有叔刀派漢娶於車里因以車里殺派真而奪其官十三年率車里來貢十九年又勸緬入貢派漢死弟派金嗣天啟二年阿瓦破之會洞吾伐阿瓦阿瓦退其差發額銀四十八兩 本朝雍正

八年總督鄂爾泰奏據土司刀派夷呈稱仰賴

皇上洪福安享太平年年豐稔情願自雍正七年為始每年納  
募迺廠課銀六百兩以充兵餉奉

旨孟連地處極邊總督鄂爾泰化導有方俾各抒誠効順貢納  
廠課孟連土司廠課每年六百兩為數太多著減半收銀三  
百兩以昭朕系遠至意其雍正八年已解司銀六百兩著將  
一半即准作辛亥年正課今入于緬

騰越疆域西至大金沙江自八關築而關內僅有南甸隴川干  
崖蓋達猛卯五土司地乾隆三十五年於戶腊二撒添設兩長

官司遂為七土司餘俱棄於關外矣騰越居北而七土司在南  
近州境者惟南甸自南甸而分左右則為干崖蓋達左則為  
隴川猛卯戶撒腊撒所謂土官者猶得古人分土之遺意傳祚  
相承後世重流輕土土官因以自棄騰越土官惟麓川思氏以  
強橫見滅餘俱保姓受氏以至於今且數百年嗚呼休哉

南甸宣撫司始自刀落蓋其先有刀貢猛者本姓龔江南上  
元人明初以百夫長隨征雲南遷千夫長駐南甸旋以招撫  
曩猛功授騰衝千戶賜姓刀按滇通志以為自改姓此說頗近之是蓋以衛千  
戶而駐防南甸者也南甸舊名南宋至元二十六年置南甸

路軍民總管府領三甸明洪武十五年改南甸府永樂十一年改南甸州隸布政司時刀貢猛之弟貢罕通志罕作蠻入貢因以貢罕為南甸土知州宣德三年貢罕上言為麓川侵其地請討之朝命不許諭麓川還其侵地五年因請於所還地置四巡檢司上命吏部除官八年又奏與麓川接境舊十二百夫長在騰衝千戶所恃賴邦哈等處軍民兼守後麓川侵據不守者十餘年今蒙勅諭還竊恐再侵乞於賴邦哈九浪莽孟洞三處各置巡檢以土軍楊義等三人為之下三司勘覆如所請正統二年報麓川思任法奪羅卜思莊二百七十八

村乞遣使諭還命鎮府沐晟處置奏聞會大兵征麓川刀氏從征有功九年陞州為宣撫司以貢罕子落硬為宣撫司通判劉思勉為土同知天順二年復置南甸土驛丞時落硬子落蓋為宣撫上言南甯伯毛勝遣千戶蘭愈占其招入地逼民逃竄朝廷命三司巡按詣勘以所佔地退還治勝愈罪落蓋故子刀落賓襲遞傳刀落過刀落樸刀落成刀落正刀落泰刀落泰滇志作刀落憲當萬曆十一年冬陷於緬其子刀落臨以平岳鳳功陞宣慰司是時刀氏再有功於國自落臨傳大才落掌落慶落啟落保父子相繼者凡十有一世落保謝病讓



其兄呈祥時明之季也呈祥立最久以投誠功康熙元年重  
頒印信號紙後呈祥老迭傳啟元恩賜恩賜襲在雍正間傳  
銘鼎以至於今三錫皆世及計刀氏自貢猛起至三錫凡二  
十世越四百年爲三宣冠比於古之任宿須句顓臾世守皞  
濟之祀是何功德而留貽之遠耶然自貢猛以招撫曩猛落  
硬以助平麓川落臨以助討岳鳳世効誠節如此至恩賜銘  
鼎三錫三世皆以幼孤恩賜母李氏銘鼎母放氏三錫母思  
氏皆以守志撫孤不墜先業著聞是猶有江表風也其世祀  
也宜哉嗟乎龔氏以一小校隨黔國入滇而胙土縣於黔國

可不謂賢乎宣撫世居蠻莫在司東今移永安在司西司治  
故爲府州地在半箇山下乾隆中移駐防兵及州判於司思  
氏請於官撤其故署堂歸永安情詞酸楚事具吳楷所紀中  
其所屬羅卜思莊與小隴川皆百夫長之分地其世襲知事  
者二曰謝氏曰悶氏謝氏居曩宋悶氏居蓋西所部夏獨直  
通蠻莫江司南百里爲南牙山險峻延袤幾百餘里爲入緬  
之大路上有石梯緣梯而上有木柵周一里昔王驥破麓川  
取道於此前通銅壁關關外布領垂哈舊爲百夫長地踰蓋  
達外有岡德戶岡近孟養故南甸所部直抵大金沙此昔日

形勢之大概也自八關設而諸險棄之關外以至於今可慨也夫宣撫本上元龔氏而從夷姓曰刀其稱出於賜姓恐未然昔有夷酋三人降於中國居久之漸習華風請賜姓於王將將謾之曰汝輩怕刀剝耳遂以爲姓而刀氏最多今爲土司者刀氏十居六七漢人之竄入者皆改姓刀龔改姓刀其意亦然以刀姓世雄長能服諸蠻也仲雍嗣吳莊躋王滇皆因其俗以爲治數傳之後幾不似中國人亦何怪哉其世稱落某通志落作樂隴川思氏世稱某法他書法作發夷性信禩祥小數多避忌尙吉利故迭傳必帶此稱謂足以永世云

舊額徵差發銀百兩今十一兩

麓川宣撫司者當元世祖中統初其酋多線瓜內附至元十三年乃立麓川路居茫施路之東其地曰大布芒曰跋頭附賽曰跋中彈吉曰跋尾福祿培皆白夷所居也以其路隸金齒宣撫司都元帥府閱八十年而至順帝至正初麓川路思可法不靖數擾其鄰未知思可法於多線瓜何屬於是命河南參政賈敦熙討之以瘴起還師再命塔失把都魯討之亦不克引還可法遂乘勝并吞諸路遣其子滿散入貢時中原亂元人不暇顧邊外寢而不問麓川遂坐大矣可法死子昭

併嗣自立爲宣撫傳子臺遍其叔昭省殺而代之踰年昭省爲盜所殺其弟思瓦法代立部下荅魯方刀思郎殺瓦法而立其姪思倫法倫法卽滿散子也時明兵已定雲南洪武十五年倫法於衛指揮王真處降附十六年春諸夷忿真立衛鎮守不恤衆共推前土府高公構麓川兵數萬破騰衝夷其城執王真沐英遣部校郭均美諭倫法聽命遂放真還因置平緬宣慰使司以倫法爲之尋改爲麓川平緬宣慰使司蓋合元時兩路而爲一勢益大矣十八年倫法復反寇景東都督馮誠擊之失利千戶王鼎戰死二十一年正月思倫法入

寇結砦於摩沙勒沐英遣都指揮甯正破之斬首千五百餘級三月倫法悉其衆號三十萬戰象百餘復入寇定邊以報摩沙勒之役英選士三萬騎晝夜兼行凡十五日抵賊營遣都督馮誠先出奇兵挑之賊以萬人驅三十餘象逆戰指揮張因率騎卒五千爲前鋒賊渠跨巨象直前我軍注矢連發中象左膝及脇象仆渠走追射殺之諸軍譟於前殺賊數百獲一象而還英喜曰賊不足平也乃下令置火銃神機箭爲三行列陣中俟象進則前行銃箭俱發不退次行繼之又不退三行繼之詰旦分軍爲三隊馮誠將前甯正將左都指揮

湯詔將右將士鼓勇進賊悉眾出營結陣以待渠帥把事招  
綱等皆乘象象披甲負戰樓若欄楯懸竹筒於兩旁置短槊  
其中以備擊刺陣既交象突而前諸軍擊之矢石俱發聲震  
山谷羣象股栗反走張因張榮祖乘之直擣其寨縱火焚之  
烟焰張天還復邀擊殺傷甚眾有昔刺者賊之梟渠也復率  
眾死戰左師少卻英登高望之命左右取其帥首左師遙見  
一人拔刀飛騎下懼率眾更進英督戰益急不移時賊大敗  
斬首二千級俘萬餘人生獲象三十有七餘皆被矢如蝟死  
渠帥刀斯郎理各中百餘矢斃象背上餘眾潰英帥師追之

賊連日不食死相枕籍倫法遁去二十二年倫法遣把事招  
剛來言往者爲逆皆由刀思郎等乞貸死願輸貢遣楊大用  
賚勅往諭倫法令獻刀思郎等百三十七人并償軍需費倫  
法從命仍命爲宣慰司定歲貢有差二十九年緬甸來訴麓  
川屢以兵侵其地遣行人李思聰等使緬及麓川倫法惶恐  
謝罪願罷兵是時倫法所部刀幹孟叛思聰等以朝廷威德  
諭其部眾畔者稍戢倫法欲倚使者力服其下強留之思聰謝  
歸倫法送之境上已而刀幹孟遂倫法倫法奔沐春春與俱  
至京見上上憫之命春爲征南大將軍統何福徐凱瞿能等

率滇川兵討幹孟先送倫法於金齒檄幹孟來迎不應遂進兵踰高梁公山直擣南甸大破之殺其渠刀名孟斬獲甚衆還兵擊景罕寨不下賊益盛福告急春率五百騎往乘夜至怒江詰旦徑渡馳躡揚塵蔽天賊以爲大軍至率衆降乘勝擊崆峒寨賊夜潰走刀幹孟乞降上以其反復不許福尋斬幹孟思倫法歸麓川旋死永樂元年倫法子散朋來嗣號思行法二年遣內官張勤等往諭之行法遣其目刀門賴訴孟養木邦侵其地時春弟晟嗣西平侯上命晟往諭之并遣員外左緝賜麓川冠帶襲衣其後每歲入貢十一年行法請以

弟任法襲職從之任法遣使貢象馬宣德元年遣使賜麓川錦繡時麓川木邦爭界晟奏麓川所屬陀甸大頭曲比爲亂請發兵討上命撫之置麓川所轄大店地驛丞一員以土人刀捧爲之三年任法奪南甸地晟復請兵討之不許正統元年晟復論奏任法奪南甸羅卜思莊等處二百七十八村并累侵干崖騰衝潞江等處擅置官目乞調大兵進討明年十月而思任法反初朝廷以任法與木邦相仇殺奪其官以孟養宣慰刀氏代刀賓玉勢弱不能輯諸夷思任法叛於麓川侵孟定灣甸大殺掠沐晟以聞至是復侵南甸州命晟招之

不奉詔三年十二月掠騰衝南甸取孟養地賓王奔永昌死  
思任法遂居騰衝據潞江仍自稱曰法法者王也上遣主事  
楊甯諭之不服四年正月命晟率方政沐昂討之太監吳誠  
曹吉祥監軍至金齒思任法遣其將緬簡斷江立柵師不得  
渡初刀賓王時常遣任法使晟晟兒畜之至是遣車琳招任  
法降佯許諾晟信之無渡江意楊甯曰兵未加而稱降詐也  
懼有後悔不聽以甯督餉金齒緬簡數挑戰政怒造舟六十  
艘欲渡江晟不可政憤獨率麾下渡江擊緬簡追至景罕寨  
破其柵斬首二千餘級獲象三十餘遂與其子瑛部將顧勇

等乘勝深入至上江伏四發政求救晟怒其違節制不遣久  
之以少兵往至夾象石不進政至空泥知晟不力援乃遣子瑛  
還遂策馬突陣死一軍盡沒晟燒江上積聚奔還至楚雄詔  
問狀晟懼罪遂卒時任法兵愈橫犯景東孟定殺大侯土知  
州刀奉漢等破孟賴諸寨降孟連等長官司且上書言始因  
潞江安撫司線舊法相邀報仇後爲線舊法誣子入寇致大  
軍壓境惶恐無地今請貢歸命其悖謾如此五月以沐昂吳  
亮馬榮翔張榮進討捷於潞江七月思任法屯孟羅大掠據  
者埂昂進克之賊宵遁威遠土知州刀蓋罕又敗之於威江

六年思任法遣使入朝謝朝議以爲可撫楊士奇亦以爲然獨張輔以爲思氏世職六十餘年屢抗王師此而不誅示弱於外夷非策也上從之時內臣王振喜立邊功爲之主於是王驥蔣貴率十五萬之師出而王驥且三征之遂平麓川按思氏以白夷種元時思可法名始見已跋扈倫法蓋可法之孫滿散之子也當洪武時再降再叛至於定邊之役爲西南一大戰始能勦之其後所部內亂矢土來歸又爲之出師定亂復其故土國恩大矣遺孽任法仍肆跳梁三勞王師逃竄阿瓦許以孟養乃得縛歸及其孥屬人三十二中塗不食垂

死奄奄王政斬頭函之北上機法卜法遁匿自如其部衆猶擁任法少子思祿於孟養與王驥立誓江邊景泰五年緬執機法及妻子六人獻俘京師伏誅卜法遠遁詔不必窮追有遺孕思洪法潛居孟養成化時鎮守沐瓚猶獲任法孫思命法送京請發沿海登州衛思氏自是逐亡蓋世濟其凶也征麓之議以張輔爲正若如楊士奇則旣棄安南又棄雲南豈所以爲國乎思任法之狡土司從亂之罪不下於黎利而雲南安堵晏然則三征之力也

隴川宣撫司者始於恭頊爲日淺而多氏代之以至於今明

正統十一年旣平麓川因改爲隴川以恭項爲宣撫恭項者  
取麓川時首先歸附故命之也其時土司有同知副使僉事  
等官以刀歪孟爲同知刀落曩爲副使隴帝爲僉事皆從恭  
項請旋思任子機法卜法復出擾恭項恭項內奔朝廷以其  
父子刻虐蠻人安置曲靖卽以同知刀歪孟爲宣撫未幾死  
遂以多歪悶代多歪悶者亦白夷種其祖多線瓜當元中統  
初舉麓川內附歸功於思氏退爲隴川陶孟者夷言頭  
目也隴川故名平緬其地曰騾甸曰羅必四莊曰小沙摩弄  
曰騾賧頭至元十三年立平緬路隸宣撫司與朶遠及茫施

鎮康鎮西麓川南賧所謂金齒六路一賧也其陶孟爲線瓜  
線瓜之子爲多甸法多甸法之子爲多歪悶自元中統至明  
正統景泰間百八九十年凡三世蓋皆老壽而歪悶遂起爲  
宣撫景泰七年修職貢成化十九年死守土垂四十年子多  
亨法代傳子淫淫三子多鯉多鯉多鯪淫死鯪弑其兄鯉而  
自立按問伏辜立鯉子多參詔爲宣撫司參詔死子士甯立  
有岳鳳者江西撫州人入土甯幕土甯寵之妻以妹生子曩  
烏父子梟雄奸黠如泥濇以罔土甯行媚於內而愚弄之於  
外不翅也時緬酋莽瑞體虎視諸夷招土甯土甯不從岳鳳



詞間勸士甯行至擺古歸鳳使其子曩烏斃殺士甯其妻懷  
印攜二子多忠多孝奔永昌當事不能救令歸岳鳳襲殺其  
妻女奪其印投緬遂據其地時萬曆五年也十年岳鳳連兵  
象數十萬其子曩烏別領兵六萬分道內侵勢張甚事聞大  
府莫知所措乃調劉綎鄧子龍以禦之卒擒岳鳳父子獻俘  
於朝事平以士甯子多忠嗣職忠死多思順襲二十年莽應  
裏人寇窺等練思順奔猛卯會官兵大戰於栗柴壩追逐之  
思順死蠻莫思正乘其喪襲據隴川旋去仍歸蠻莫思順子  
安民乃得立守將索賂不能堪三十八年安民叛入緬已而

緬聽撫遣安民歸安民久據蠻灣桀驁甚參將周全遣二指  
揮襲之爲所敗巡撫周嘉謨督兵備道參將等討之其族人  
挾其弟多安靖誅之以獻先時萬曆中分隴川副使多恭居  
遮放同知多俺居猛卯至是隴川亂甚安靖尙幼而安民之  
弟安邦亦附緬寄居蠻莫於是文武會議共立多安靖奏稱  
隴川與干崖南甸並爲三宣作我藩衛多安民背漢投緬罪  
不容誅天討所加已膏鈇鑕安靖以安民親弟絕無從逆之  
念又有討賊之功舉其祖父故土而畀之天理人情旣安且  
順但因安靖幼乃以副使多恭之子思譚輔安靖行宣撫事

俟十年後安靖已長仍歸安靖又恐思譚竊據不歸以宣撫  
印貯於騰越州庫仍設官兵於杉木籠山控制之於是隴川  
粗定迨明之季滇中亂多安靖爲流寇孫可望部下王復臣  
所殺其子多紹甯以投誠功康熙初授宣撫世職紹甯年老  
無子告替以與弟述甯未襲而故以述甯子多勝祖襲勝祖  
以年老告替子多治國襲治國死子多世臣襲在康熙雍正  
間世臣年老告替子多益善襲益善亦告致子多有功襲有  
功死其嫡子朝勳嘗聘蓋達土司刀思儒女未娶而夭以庶  
弟朝珍娶刀氏乾隆三十三年襲時軍興隴川當要衝三十

四年以失察段思瑞偷越部議革職留任三十五年冬以多  
朝相隨蘇爾相在緬寄信其弟多朝弼首報遲延安置昆明  
四十四年春正月內多朝珍與族目岡頭不和構爭三月朝  
珍來州告病五月二十九日病故州城以多有功胞弟多有  
爵管理地方有爵年老今替於朝惠明一統志云正統十一  
年置隴川宣撫司於隴把其地東至芒市南至木邦西至干  
崖北至南甸其風俗同南甸山有馬鞍摩黎羅木水有湯泉  
土產大芋長尺二三寸而今志云東至猛古猛上一百八十  
里南至慕習滿鳩一百八十里西至干崖蠻酒八十里北至

杉木籠山頂八十里有上下十二岡四練通老官屯新街夷境舊額徵發銀一百七兩今八兩按麓川思任法之變騷動天下僅乃克之亦不能盡其餘孽任法忘其父失國內奔朝廷爲之討叛安定夷性犬羊自殄種類宜矣隴川岳鳳之變亦然非劉鄧何能遽止多氏襲土柔而可馴故屢蹶仍起以至於今多蓋刀之轉音夷不知書惟漢人所寫耳

猛卯安撫司者所治本麓川地故平麓城也明萬厯初分隴川副使多恭居遮放同知多俺居猛卯皆多氏族白夷也時緬猶猖獗多俺爲緬耳目引賊寇邊隴川多思順患之二十

六年乃糾思化並芒市多泰等擊多俺殺其子多荒十二月多俺糾衆襲遮放敗還不復歸猛卯投木邦據曩義山永昌同知漆文昌授計木邦罕欽令擒之謀洩多俺欲奔擺古追及雷聳弁其子多烘多曩斬之乃築堡於猛卯號平麓城於是猛密頭目思化敗緬於送速緬逐之入居蠻莫朝廷以爲蠻莫宣撫司思化死子思正嗣入據隴川已而回蠻莫緬人潛師襲取思正首而去乃立其弟思忠後其地爲思線所占據忠乃退處干崖之蠻酒會巡撫周嘉謨平多安民之亂乃籌平麓城屯田事宜請以忠安插猛卯開屯改姓衍名衍忠

復論擒多安民功授安撫司世職其後爲緬所擄被殺以舍  
目衍瓏承襲時永明王尙在滇瓏故瑾襲瑾死珍襲珍故子  
瑄襲順治末年瑄以投誠功仍授世職傳秘志珩初凡四世  
皆世及初故無子今以弟衍矜襲焉其地東至遮放抵南弄  
六十里南至木邦界抵江邊十里西至猛密界暮習天馬關  
八十里北至隴川界邦中山頂四十里當衍珩襲職時值緬  
甸亂其酋噠喇爲得楞所殺子色亢瑞凍出奔木梳頭目甕  
藉牙起兵逐敏家復阿瓦城計敗得楞遂由木梳徙居阿瓦  
自立舊所屬各土司不服者以兵劫之時色亢瑞凍挈妻子  
土司亦不至盡歸於彼惜哉

族屬男婦八十餘人至猛卯文武官具以聞總督愛必達巡  
撫郭一裕會檄猛卯土司衍珩驅出境時乾隆十九年也若  
使當時受之如明初之所以待思倫法者甕氏必不猖獗諸  
干崖宣撫司者始祖郝忠國本江甯人駐干崖故元之鎮西  
路也在柔遠路西東隔麓川其地曰干賴通志作額額曰渠瀾額中統初內附至元十二年立鎮西路軍民總管府領三甸明  
洪武十五年改鎮西府永樂元年設干崖長官司以忠國領  
其職改名曩歡曩歡遣目奉表貢象馬賜鈔幣有差五年設

古刺驛隸干崖曩歡復遣子思曩朝貢恩賚如例賜姓刀稱  
 刀曩戀正統九年曩戀子刀怕便以征麓川功陞宣撫司以  
 劉英為同知從王驥請也滇志云正統中刀怕率以麓川怕  
 便名見明史自怕便傳怕率怕轟怕開怕落凡四世其叔土  
 舍刀怕愈欺怕落幼劫印奪職蠻眾不服起兵相攻時宏治  
 三年也四年副使林俊參將沐詳檄諭之始釋兵歸印怕落  
 年老致仕以怕元襲怕元死子怕舉襲嘉靖三十九年緬酋  
 莽瑞體叛招諸土司入寇萬厯初怕舉死其妻罕氏木邦罕  
 拔妹也罕拔叛投緬誘怕舉弟怕文且許妻以妹怕文不從

遂與之戰緬兵十萬驟至怕文不支遂內投奔永昌罕拔遂  
 取宣撫印付其妹據干崖十年岳鳳破干崖奪其印十一年  
 劉綎擒鳳父子干崖印竟失所在而滇志云是年冬干崖刀  
 怕庚雷弄廖元伯南甸刀落憲蓋達刀思定皆陷於緬不知  
 刀怕庚又何人也干崖失印部眾無主自相承代者垂三十  
 年據其譜云怕文奔後怕瑄襲怕舉職三十九年怕瑄子定  
 邊以屢有平叛功仍授世職加三品服定邊年老致仕子鎮  
 國襲流寇孫可望據滇遣偽都督王復臣以調貢方物遲加  
 之兵時蓋達副使刀思韜乘亂謀奪其職將定邊鎮國父子

五人送滇省俱被害後鎮國子建勳以投誠功順治十六年授世職十八年辦赴緬軍需急公紀功賞賚吳逆叛飭換印信號紙吳逆平後將印劄呈繳賴大將軍營康熙二十四年接領宣撫司印隨卒子秉忠襲職一年死子捷泰幼令秉忠弟秉義護理越五年捷泰襲職捷泰於雍正元年曾差赴木邦清理猛古猛卜糧民三十二戶還報有功捷泰死子鴻業襲職乾隆三十一年邊事起辦糧辦夫起造營房塘汎諸土司中最爲効忠出力四十四年以年老告替子世侯承襲按干崖刀宣撫本江南郝氏到今四五百年刀曩戀有平麓川

功刀怕文距罕拔抗緬酋力戰不支遂歸內地刀定邊當神宗晚年疆事孔棘屢以平叛之功加服命遭際末流父子死於逆賊何其戚也其孫建勳復繼以至於今守土輸誠諒哉其地東至羅卜思莊四十里南至戶樂八十里西至蓋達五十里北至黃連關五十里今徵差發銀六兩六錢蓋達副宣撫司者本與干崖爲一族其地亦干崖之一岡蓋刀怕便之後也其世譜云正統十四年怕便已爲宣撫朝京師賜名思忠以思忠別子思効爲副長官司居蓋達思効傳子思猛猛故無子以思効兄思鎮襲思鎮傳子思國國無子

傳弟思廷滇志作刀思定萬曆十年岳鳳父子連緬甸及土司象兵

數十萬分道內侵攻雷弄蓋達干崖施甸思定求救不得城破闔室俱盡其子思官又以木邦罕氏甸緬破城為緬所執死之兩世殉國難然考其時自莽應裏用岳鳳間誘殺罕拔木邦與緬仇而云甸緬恐誤也思官既死其兄思權立死子思丙立丙死子思韜立始給副宣撫司印勅而刀定邊刀鎮國父子之被害於孫可望咸由思韜迨後順治十六年思韜仍以投誠功授副宣撫世職韜年老辭職子思元襲元死子琳尚幼以其伯叔思銘思鑑護理相繼病故母撫孤成立襲

職琳死子思弼立弼於乾隆十九年告替子思儒襲今思弼現在年八十餘矣其地東至干崖河二十里南至回弄三十里西至山腳土司城在其麓北至猛典五十里有巨石萬仞兩關壩尾一卡通夷境今徵差發銀四兩四錢按萬曆季年有刀思魯者曾有築關功蹟其氏譜不載豈逸之耶

戶撒腊撒俱我昌夷地其土司賴氏况氏本蜀人也明正統時王驥征麓川重慶賴羅義為左哨把總奉調隨征有功令守戶撒羅義傳子玉玉傳弟漢漢傳子猛弄猛弄傳子鎮鎮傳子豪豪傳弟罕告罕告傳子祥告祥告傳子送送傳弟遷

遷傳洪猛洪猛傳子國瑄凡十二傳如故康熙十二年吳逆以其地爲沐氏勳莊追繳割付國瑄死朝佐以永順鎮給割協防邊境四十二年頂襲土舍朝佐有庶子賴文明爭奪失官五十一年改設火頭以其地歸騰越州已五十餘載乾隆三十四年有干崖賴邦俊者爲通事件送猛拱土目興堂扎進京乞請復土舍舊職經副將軍阿桂查明復奏言戶撒地處極邊與野夷接壤詞訟審勘往返需時稽察奸私鞭長不及遇有調發呼應不靈若設佐雜微員旣不足以資彈壓卽僅立土舍亦未免名實不符應復設長官司以資管轄以符

體制現據騰越州細查舊案賴邦俊之父賴君愛旣係舊土司子孫請卽以賴君愛承襲戶撒長官司再查戶撒毘連又有腊撒係蓋姓承襲傳至蓋世祿亦被吳逆占奪今查蓋朝選有嫡孫蓋榮邦年力精壯人亦誠實亦請給還土職在於邊防効力且與南甸隴川干崖各土司唇齒相依內外捍禦於邊較爲得力俱允行於是賴君愛承戶撒然君愛居于崖之遮木非朝佐嫡派子孫入承戶撒戶撒夷人多不服其人居戶撒賴君賜與姪賴小五眞朝佐嫡派子孫也君愛承襲後不善撫慰是以屢尋釁端夷衆爭助君賜三十八年糾集



夷民殺君愛及君榮與幼童應祖君賜逃赴關外有死黨百餘人內有遮漫者其心腹也時令出入探伺官得遮漫因以印扎調君賜君賜從百餘人持刃擁至官兵爲卻走乃遙呼曰吾固知爾好漢殺人償命法也結黨持刃欲何爲君賜氣奪因慰諭之令遣其黨去君賜悉揮之出因泣曰小人竄伏山林亦死何如出一死以完公事耶翌日黎明縛之永昌及其兇黨皆伏誅仍以君愛子邦傑襲父職其地南至腊撒界偃西至干崖山北至彝旋山東至隴川山管六十四寨編戶一千一百一十男女口萬三千二百二十三今徵差發銀六

兩

腊撒土司况氏亦蜀之重慶人明正統時况本與賴羅義同調征南授把總至干崖身故子况倫襲職從征木邦隨故子况允忠有功給腊撒土守備允忠死子况宣襲職成化間隨征木邦陣亡子况蓋猛襲痛父陣亡以况姓不祥遂以字爲姓蓋猛死子蓋明襲無子死弟蓋元襲死子蓋光勝襲無子以姪蓋倫襲倫死子蓋哄猛襲哄猛死子蓋裕襲裕死子世祿襲迨吳逆以戶腊二撒爲勳莊蓋可陞失職可陞故其子蓋朝選於康熙三十九年布政司給劄符雍正二年奉文裁

土職歸州管轄自是子孫在腊撒居住與齊民無異乾隆三十五年以遮木通事賴邦俊請遂併復腊撒請設長官司事載戶腊下以其裔蓋榮邦爲長官司世襲給印信號紙焉其地東至隴川山南至南洒河北至戶撒界溝管三十一寨戶四百五十口二千四百五十徵差發銀四兩

右七土司者南甸隴川干崖皆爲宣撫司所謂三宣也猛卯爲安撫司蓋達爲副宣撫司次之戶腊二撒爲長官司又次之俱稱土司自明至今迭傳已數百年此外土目設於乾隆十二三年間者有四均於稱夏著功准世襲附著於後

明光隘土把總左時望係茨竹寨住民承父正邦職

大塘隘土把總二員劉爾立劉爾游係土住民

古勇隘土把總楊祖文原籍江西金谿縣人住居古勇今經六代四傳至楊克晁奉調出師新街陣亡以其孫祖文承襲滇灘關土目柴相賢原籍湖廣襄陽府人明洪武間奉調隨征到騰分駐滇灘防禦野夷乾隆十二年值滇灘土目艾允中死乏嗣衆以柴德尊舉充詳准給以土目委牌德尊傳其子相賢現襲其職

騰越故有六土司自以遮放差發銀歸龍陵廳徵止有五土司

益以新設戶腊二司遂為七土司而遮放則故屬州也

遮放副宣撫司者為隴川副使蓋其二也其起自多懷們與

隴川宣撫多歪悶皆元初多線瓜之後明正統元年多懷們

從征猛卯夷有功授副宣撫居遮放麓川平後歪孟為宣撫

居隴川傳至萬歷初有多恭多掩時岳鳳亂隴川宣撫多士

甯父子俱死亡時以多恭滇志作多茶為副使居遮放多掩為同

知居猛卯多俺顧為緬間導之寇隴川宣撫多思順土甯之孫患

之二十六年擊走多俺殺其子多荒其年十二月多俺襲遮

放敗還走木邦會多安順死其子多安民叛入緬討誅之以

其弟多安靖襲尙幼乃以多恭之子多思譚行宣撫事思譚

從征蠻莫緬瓦隴川累功益以隴川江外地為安靖領隴川

沿至多爾忠以投誠功當定滇之初仍授是職爾忠死子賢

輔襲賢輔死子世祿襲世祿死子多量襲則在雍正間也

騰越自七土司外其西界大金沙江江外為孟養江內為蠻莫

其南則為孟密又南為緬甸其東為龍陵又東為孟定東南為

木邦又東為孟良為車里孟良之南為八百大甸又東為老撾

其大勢如此今皆為緬有矣而逼近騰越惟孟養蠻莫孟密木

邦昔年征戰之所經由者亦附紀之焉

孟養軍民宣慰使司者故元雲遠路也元初於此置軍民總管府不知其酋爲誰至明而刀氏思氏始著明洪武十五年改路爲府十七年改孟養軍民宣慰使司歲輸差發銀七百五十兩永樂間宣慰使刀木且與戛里相攻緬酋那羅塢襲刀木且殺之及其長子遂據其地四年上遣張洪諭歸之宣德中麓川思氏與木邦罕氏相仇殺罕氏訴之朝廷不直思氏奪其官以其地歸孟養刀氏代治正統二年思任法逐刀氏兼取孟養地刀玉賓勢弱不能支走永昌死地遂爲思氏有王驥征之任法遁入緬其子機法卜法祿法匿孟養任法

機法先後捕誅卜法逃思祿仍據孟養麓川夷推擁思祿法爲主改名思洪逐朝廷所置緬酋之子銀起莽且上狀言緬不能撫其人民願立思氏永當差發時已三征麓川矣驥度終無如思氏何乃將祿法礮石金沙江上盟之曰石爛江枯爾乃得渡遂班師時雖授思氏金牌終無印信也凡通文書但稱金沙江奴婢而已成化中思祿以祖母琮帶及諸珍物賂鎮守太監錢能能召見飲食之思祿稍稍縱橫宏治初上給土酋金牌信符偶忘孟養人廢止但按舊籍頒給之思祿遂謂天朝復其官職矣以符牌號召諸夷略取旁邑以自廣

會孟密叛木邦參政毛科檄思祿兵攻孟密思祿以羸兵數千應科爲孟密所敗思祿大怒遂越界過金沙江攻孟密取蠻莫等十七寨科又勸巡撫金獻民請兵大舉征思祿上不許會思祿遣人奏言爲鄰惡誣願入蠻莫十七寨贖罪得比米魯仍乞以一字爲宣慰如故朝議遲疑不決思祿遂據孟養自立爲宣撫焉按滇志所記載曰爲思洪所據又曰成化中思仁子祿云云似爲兩人然據明史云成化七年錢能言緬甸欲得貢章孟養帝命往勘貢章係隴川分治孟養係思洪發所掌非緬境又余子俊言思洪發不聞有過豈可奪

其地因諭思洪發通緬貢道不得阻遏則是思洪卽思祿爲麓川思任法之少子或稱思洪或稱洪發總一人也然史又稱孟養鄰緬怨緬之執思任法欲報之嘉靖初孟養酋思祿子思倫糾木邦及孟密破緬殺宣慰莽紀歲及其妻子分據其地未知思陸卽是思祿否也自正統中思祿遁孟養至嘉靖初已六十年而思任法之祖爲思倫法而思祿之子又曰思倫大抵夷俗不以爲嫌猶楊邁之後仍稱楊邁耳思倫旣破緬緬訴於朝六年始命永昌知府嚴時泰衛指揮王訓往勘思倫夜縱兵鼓譟焚驛舍殺齎金牌千戶曹義時泰倉皇

遁乃別立土舍莽卜信守之而去值安鳳亂內地不暇究其  
事蓋嘉靖八年也後莽紀歲子瑞體報仇使卓吉侵孟養二  
十九年孟養思真使其婿別混殺卓吉瑞體攻別混父子擒  
之自瑞體盛時諸夷多從亂而孟養頭目思箇獨應副使許  
天琦羅汝芳之檄引兵萬餘於阿瓦地絕其糧道自率眾伏  
於戛撒誘緬入截其歸路待援兵已困緬至月餘汝芳爲王  
疑所阻援兵不至岳鳳遂導緬酋由間道遁思箇知之率眾  
追緬緬大敗幾獲瑞體其衆生還者十不一二六年廷議遣  
使至孟養令思箇還所俘緬兵象且賚緬金帛好言慰喻之

緬不謝七年瑞體復率兵象來侵以報戛撒之怨朝廷不能  
救思箇內奔中途爲奴郎都等執送瑞體不屈死之瑞體遂  
盡據迤西地目兵奔永昌稍安置於內地十二年思義歸孟  
養十三年思威敗緬於密堵殺多曩長十七年思遠貢方物  
賞以金幣授宣慰十八年緬報密堵之役思遠率其子昏奔  
盞西緬以其目曩瓮據之其後思轟送款於朝與蠻莫思正  
結爲唇齒據金沙江共抗緬三十年緬襲思正思轟驅兵象  
倍道救之至則正已被殺三十二年轟被襲走死緬以其目  
思華據孟養華死其妻怕氏領其地又以他目更番戍守頻

發其兵從征強悍不可縻云考孟養自刀木且刀賓玉後爲  
思任法所并麓川平後其幼子思祿入據之迭傳思倫思箇  
思義思威思遠思轟終并於緬凡思氏以名見者如此其世  
次則未詳也思氏亡於麓川而竄居孟養猶延祀垂二百年  
蠻莫宣撫司地在金沙江內騰越之西蠻哈山下山如象鼻  
行者累足自布嶺上三日至其地田土饒衍風俗與隴川孟  
密同東有等練山環以那木江直走金沙當緬人水陸之衝  
舊爲孟密分地後會長稍強擅而有之當緬報怨攻孟養時  
蠻莫土目思哲迎附莽瑞體萬歷元年共木邦罕拔隴川岳

鳳盟奉瑞體以距中國爲錦囊象函貝葉緬文稱西南金樓  
白象王莽噠喇弄玉書報天皇帝於是蠻莫與木邦干崖隴  
川皆附緬緬爲置將以守之十年緬連諸夷入犯劉綎鄧子  
龍征之綎招岳鳳遂攜鳳父子往攻蠻莫平之獲思哲釋不  
誅露布所謂討蠻莫而隨宥之欲逆黨畏威而創懲是也綎  
兵抵阿瓦蠻莫思順先陷緬至是來降時思化居猛哈即蠻哈也  
與池西思威木邦罕鳳俱殺緬將歸綎會朝廷以綎鎮蠻莫  
思順仍爲宣撫司綎遂捨阿瓦回蠻莫揚兵金沙江振旅而  
還綎還諸夷多散去緬復出攻孟養及蠻莫聲言復仇副使

李材遣兵援之戰於遮浪大破其象陣生擒五千餘人招蠻  
莫酋思化來歸仍居蠻莫十九年緬困蠻莫思化告急會天  
暑軍行不前裨將萬國春夜馳至多設火炬爲疑兵緬懼而  
退大敗之所謂萬厯以來西南戰功第一者也二十年九月  
緬攻蠻莫思化奔等練山鄧子龍救之軍等練緬進屯遮放  
子龍擊之大戰於控哈緬退屯沙洲相持月餘緬尋去二十  
一年十一月緬遣允墨率兵入據蠻莫思化敗走允墨分道  
內犯追思化蓋由思化居蠻莫爲中道梗緬故恨思化急攻  
之時當事不察有安插思化之疏且歸咎於思化其實不然

也二十四年十月緬遣思仁丙丙寇蠻莫思化求救參將吳  
顯忠擊走之斬丙測是時邊威稍振諸蠻皆絕緬入貢二十  
六年孟養思轟亦棄緬來歸二十七年緬攻思轟檄各土司  
禦之緬潰去時思化之子思正與思轟結爲唇齒據金沙江  
共抗緬二十九年思正乘隴川土司多思順之喪襲隴川已  
而回蠻莫三十年阿瓦雍罕與木邦罕裨襲思正取其首而  
去思轟聞之駭兵象倍道救之至則已無及矣三十二年緬  
攻孟密徵兵於思轟參將王廷光止轟無發轟從之縛其使  
以獻緬怒攻轟轟走死都司王萬年救之亦不及緬以思華



據孟養明年陳用賓遣副將陳寅擒緬目多罕復蠻莫界焉  
其後終陷於緬崇禎末蠻莫思縣為緬守曩木河永明走蠻  
莫思縣使告於緬云按思正為緬所襲殺而滇考云思正奔  
騰越當事殺正以止緬即陳用賓之疏亦自云然後守備李  
天常之蠻哈至橄欖坡有鳥夜鳴聲甚哀天常異之詢之士  
人對曰自思正死後即有此鳥哀鳴三年矣因述思正見枉  
狀天常感之乃祝之曰若果思正當為爾復仇復地遂止不  
鳴用賓乃為復其地

孟密宣撫司者明之立各土司孟密最在後其酋本為木邦

屬地故附木邦有磚城無戍樓產花果瓜蔬與內地同南牙  
山峙其北摩勒金沙二水環焉山高田少米穀最貴又多地  
罕鬼為行人崇北距騰越一千里有數道一由木邦錫波入  
一由孟卯至孟廣入一由邦抗魯祖渡莫勒江過南牙而入  
一由蠻莫入明永樂間木邦宣慰罕賓法以征八百緬甸功  
授以孟密十三處其所部有寶井為木邦利府陶孟思歪領  
之陶孟者由華言頭目也木邦宣慰司罕揲法以其女曩罕  
弄妻思歪法明史作外法罕揲法死其孫罕窋法立明史作落法嗜酒  
好殺曩罕弄以尊屬不樂受節制景泰中遂以孟密叛天順

二年與思坑攻落法卽罕空法也落法奏之時曩罕弄逐宣  
慰據公署殺掠鄰境兵力日盛自稱天娘子其子思柄自稱  
宣慰朝命往撫之驕蹇不服且欲外結交趾逼木邦其橫如  
此朝廷置之成化初毛勝守雲南孟密寶石許得自貢不關  
木邦太監錢能尤利其珍賂曩罕弄益怙勢無忌掠地自廣  
十年侵隴川沐琮奏之十六年太監王舉索孟密寶石不得  
因疏孟密叛木邦罪請征之曩罕弄大懼會有江西人周興五  
者逋孟密因爲曩罕弄計遣人賚金寶賂政府求釋罪且請  
授官政府萬安許之遂授意副都御史程宗與序班蘇銓往

時十八年也明年宗至孟密曩罕弄恃有內援益踞傲不出  
廷宗且要宗過南牙山就見坐講宗不得已從之曩罕弄乃  
曰我孟密之於木邦猶大象之孕小象也今小象長成軀倍  
大象矣甯能復入大象腹中乎宗不能折反然之於是銓受  
其金給宗上奏以所侵木邦地畀之爲設安撫司以思柄爲  
使世其職時二十年也木邦人詣宗訴辯宗輒管止之狀聞  
政府大喜遂以宗撫雲南尋遷刑部尙書曩罕弄旣立盡奪  
木邦地罕空法奔猛正雖屢次奏訴竟不得直由是孟養諸  
酋大不平遣大陶孟倫索提兵衛罕空聲言必滅孟密會宏

治改元副使林俊稍割孟密地還木邦曩罕弄懼不敢逆命  
遂與木邦並立爲世仇矣三年罕空法發宗等受金事時宗  
已致仕追論之獄具帝以事在赦前不問六年守臣奏孟密  
侵奪木邦兵連禍結垂四十餘年屢撫屢叛勢愈猖肆請討  
之不行九年罕空法及思揲各遣使貢初思揲圍蠻遮木邦  
宣慰妻求救於孟養思陸孟密素畏思陸之兵聞其將至遂  
解去木邦與思陸謀共取孟密於是蠻中之患又在孟養矣  
自萬安程宗勘處失宜諸酋紛紜進退中國用兵且數十年  
嘉靖初思陸子思倫與木邦宣慰罕烈殺緬酋莽紀歲而分

其地自思柄授安撫繼之者思揲思真真年至百十歲其後  
思奔思溷爭立緬人爲殺奔立溷萬曆中溷改名思忠率思  
化思服來歸遂陞爲宣撫忠復投緬朝廷以其母罕烘爲宣  
撫十六年緬攻孟密罕烘不能支率子思禮從子思仁奔孟  
廣而孟密遂失十八年緬復攻孟廣罕烘思禮奔隴川思仁  
奔工回而孟廣又失先是思忠復投緬其妻甘線姑通於思  
仁欲妻之罕烘不許至是以兵犯隴川欲擄線姑不得亦歸  
緬緬以孟密界之食其地

木邦軍民宣慰使司者古爲百夷卽爨夷也在雲南之西南

舊云自古不通中國而滇志云蜀漢木鹿王之裔理或然也  
元世祖時命將伐交趾經其所部盡降之舊名孟都又名孟  
邦至元二十六年立木邦路軍民總管府領三甸洪武十五  
年改木邦府以罕的法爲土知府永樂二年改木邦軍民宣  
慰使司以罕的法爲使時征八百罕的法功最遣使賚之及  
其部領皆遍明年來貢頒賜及其母妻罕的法子罕賓法來  
朝七年奏緬酋誘臣叛不敢從逆若天兵下臨誓効命帝嘉  
其忠勅勞之重賜及其祖母母妻十年遂破緬二十餘城寨  
獻俘京師宣德二年罕門法襲遣使慰賜弁及祖母母妻正

統三年征麓川以兵會五年罕蓋法與其祖母美罕板大敗  
麓川於孟定孟連地殺部長二十斬首三萬餘級獲馬象器  
械甚衆帝嘉其功加罕蓋法懷遠將軍封美罕板太孺人七  
年又攻拔板罕貢章等寨追至孟蒙獲其孥及象遣陳儀勞  
之且曰能擊賊首獻卽予以麓川八年免其歲辦金萬四千  
兩遣使謝且獻所獲思任法家口十一年同緬甸獻思任法  
且修職貢因求麓川地朝廷以孟止地給之并遣諭祭其母  
以表忠勤免歲辦八錠銀三年景泰元年奏乞地未報其子  
罕落法輒發兵據之詔易以底麻之地四年罕落法襲族人

構難落法避於孟梗遣人求救詔撫諭之俾與族人盟然落  
法不敢歸仍居孟都歲調蠻兵二百更番獲之天順元年鎮  
守奏落法與所部相攻求救朝廷以非犯邊不許蓋所部卽  
孟密也明年落法奏爲思坑曩罕弄所攻蓋曩罕弄據孟密  
而叛木邦也史稱曩罕弄爲宣慰罕揲法之女嫁孟密思外  
法卽思歪歪  
外聲近罕揲法卒孫落法嗣曩罕噉族人與爭按木邦  
傳木邦始罕的法而罕賓法罕門法罕蓋法蓋法卽落法之  
父無有揲法又稱孟密復叛木邦因宣慰罕宓法親迎婦於  
孟乃寨孟密土舍思揲誘高答落等聚兵阻路罕宓法不得

歸依孟乃三年巡撫張誥奏遣大員撫諭思揲猶不服乃耀  
兵示必征高答落等懼謀歸罕宓法思揲欲殺之罕宓法乞  
救乃調土兵合三宣兵至蠻遮思揲懼始解去罕宓法乃得  
歸木邦史不詳其年月又一傳中旣稱罕落法又稱罕宓法  
未知其卽一人或兩人旣稱落法避於孟梗又稱宓法困於  
孟乃未知其卽一事或兩事史之橫決錯亂如此惟滇志與  
陳氏八編俱云罕揲卒孫罕宓立而史旣稱蓋法子落法又  
稱罕揲法卒孫落法嗣後又有罕宓法故不如滇志之簡明  
也嘉靖初宣慰罕烈與孟養思倫滅緬分其地隆慶二年土

舍罕拔告襲不得叛投緬時緬莽瑞體復強用罕拔收隴川  
萬歷十一年其子應裏誘拔殺之以弟應龍襲木邦拔子進忠  
攜妻子奔內地追至姚關焚順甯而去十一年官兵破緬立  
進忠子欽欽死其叔罕禧約暹羅攻緬緬恨之遂以三十萬  
衆圍其城請救於雲南援兵不至城陷罕氏遂亡緬以孟密  
思仁領木邦思仁憑恃瓦夷差其目海慶據控尾求猛拿寨  
又與召依坎換象干戈相尋焉按木邦於明初自罕的法而  
罕賓法而罕門法而罕蓋法而罕空史作落法而罕烈而罕拔而  
罕進忠而罕欽而罕禧以名見者凡十其世次未盡詳也木

邦罕氏最忠順於明屢有大功名所以賓禮之最渥不同他  
土司故於六慰中分地最廣

師範曰施羈縻于外域非絡首穿鼻之術蓋授之以爵賞被  
之以章服俾自爲治而用夏之變與焉全滇之夷其麗不億  
而提其綱領列冠帶者百數十人或縮符與銅墨鷹行或捍  
圍與游徼鷹進或沒齒不與期會或經年不釋介冑深山荒  
服崩獸角以奉版章棘矢桃弧賈蛙怒而敵王愾無選擇更  
置之勞有禦侮奔走之効殆羈縻之善物也倘負三苗之固  
恃夜郎之大跋戾病於指脛懸疣扼於喉吻潰癰必決則存

亡恆係之是蓋昆明劉太僕文徵之言也後之當事者固執其說只求捍圍敵愾之功遂忘蹶戾懸疣之害遇有小警輒以調土練爲先著愚則以爲勢隨局變事以時遷元明之際彼爲土司者各君其境各子其民寓戰守於耕鋤之中視鄰壤俱同大敵故衝鋒陷陣皆其所習聞而習見者我國家仁漸義摩百餘年來已取草衣卉服之徒列之編戶土司特尸居之餘耳夫以編戶而驅之臨陣雖有戈矛不啻徒手卽使此輩果成勁旅亦豈地方之福哉至若沿邊之南甸耿馬等處又當別論信賞罰嚴紀律惟在用之者之能得其道矣

戊辰元宵後十日記於江山一覽樓

文明之化至我朝爲獨盛百餘年來變侏僂以詩書韋椎跌而冠帶各土舍咸知向學鎮南州陳公封由雍正乙卯科第三名舉人中乾隆丁巳會試雲南縣楊公豐中癸酉科鄉試張公中壬午科鄉試石屏州龍公鼎中甲午科鄉試昆明縣那公鳳中甲寅科解元其中武舉以及應貢蔣庠者更僕難數惟建水縣李公齡號松屋致力於詩王太守文極其推獎較高雪君若不及較沐生白遠過之

沈氏

三

文苑示清錄  
一  
日  
公  
工  
山  
一  
豐  
豐

